

## CIJELO SELO PRIMORANO DA GLASA ZA ODREĐENOG KANDIDATA NA IZBORIMA DA BI IM SE URADIO SEOSKI PUT

### Obećanje stranke selu uslovljeno glasovima njegovih stanovnika

Uoči Općih izbora 2022. godine, mještani jednog malog sela suočili su se sa kontroverznom ponudom jedne od vladajućih političkih stranaka i njihovog kandidata na izborima. Naime, dobili su obećanje da će im se konačno uraditi seoski put koji je bio zapušten, ali pod uslovom da cijelo selo na predstojećim izborima jednoglasno glasa za navedenu stranku i kandidata.

### Prisilno glasanje kao alat vođenja izborne kampanje

U periodu prije izbora, predsjednik mjesne zajednice, preuzeo je na sebe ulogu da uvjeri svako domaćinstvo u selu da glasaju za kandidata i stranku. Usprkos negodovanju mještana, predsjednik je opravdao svoje postupke govoreći mještanima da se ne može drugačije odraditi nego na takav način. Prema njegovoj priči, i sam je bio uslovljen, odnosno naveo je da je morao prikupljati glasove mještana, inače više ne bi bio predsjednik mjesne zajednice, a onda ne bi imao niko da radi u interesu mještana, a samim time ne bi došlo ni do izgradnje puta.

### Iznošenje ultimatumu i na stranačkom skupu

Stanovnici malog sela su također bili prisiljeni doći i na skup u organizaciji te stranke. Tamo su izričito upozoreni da će se suočiti sa posljedicama ako ne glasaju onako kako je dogovoreno.

Kandidat za kojeg su bili primorani glasati je naveo na tom skupu da će jedna imenovana osoba pratiti poštivanje dogovora, a da puta "neće vidjeti" još uvijek te da će se isti odraditi tek završetkom Općih izbora i nakon što se glasanje i brojanje glasova zvanično završi.

### Mještani svjesni manipulacije

Jedna mještanka (24 godine) priznala je da su svi bili svjesni očite manipulaciju glasovima cijelog sela i navela kako se radi o ucjeni i kupovini glasova. Međutim, navodi kako su se svi, uključujući i nju, osjećali prisiljenima povinovati se, jer se činilo da obećana izgradnja ceste ovisi o njihovoj poslušnosti, što se pokazalo istinitim jer je malo nakon održanih izbora dobilo put.